

Fundacion Guia Mi a celebra 65 aña di existencia

ORANJESTAD – Diamars atardi, Fundacion Guia Mi tabatin un recepcion senciyo cu presencia di Minister di Husticia, Andin Bikker, miembronan di e directiva di e fundacion y demas invitadonan pa celebra nan 65 aniversario di existencia.

Directora di e fundacion, Anneke Nicolaas-Lucas, a bay un poco den historia di e fundacion cu a wordo crea dia 22 di october 1954, inicialmente bou e nomber di Sint Martinus Stichting. Na aña 1995, e fundacion a cambia di nomber y el bira Fundacion Guia Mi. E ta un instancia di custodia di menor y custodia di famia.

Sra. Nicolaas-Lucas a gradici e directiva cu ta un sosten grandi pa nan por realiza nan trabou y el a expresa cu e directiva aki 'semper t'ey pa nos', y e ta sinti un gran sosten for di nan. Tambe el a expresa palabra di elogio pa e trabou cu su team ta bin realizando cu entusiasmo y hopi energia. Ademas nan ta traha cu hopi solidaridad y nan ta sostene otro, aunke tin bi-aha nan ta yora cu otro den situacionnan dificil cu nan mester atende den nan trabou, pero tambe nan ta expresa nan felicidad, ora cu tin motibo pa esey.

Durante e recepcion aki nan a presenta un video pa conmemora e di 65 aña di existencia.

